

342/23  
Bosna i Hercegovina  
Federacija Bosne i Hercegovine  
Zeničko-dobojski kanton  
GRAD ZENICA  
Sektor za javna preduzeća i javne ustanove

Broj: 19-45-10489/23  
Zenica, 15.05.2023. godine

## STRUČNA SLUŽBA GRADSKOG VIJEĆA

PREDMET: Izvještaj o poslovanju JP "Vodovod i kanalizacija" d.o.o. Zenica za 2022. godinu

Sektor za javna preduzeća i javne ustanove u ime Skupštine razmotrio je Izvještaj o poslovanju JP "ViK" d.o.o. Zenica za 2022. godinu sa pripadajućim setom izvještaja. Nakon analize dostavljenih dokumenata, Sektor konstatuje:

U 2022. godini JP "ViK" d.o.o. je zastupao direktor Emir Pašalić, dipl. ing. građ., reizabran na četverogodišnji mandat 28.10.2021. godine, dok su funkciju Nadzornog odbora obavljali Emir Korlat, Muamer Arnautović i Haris Mahić, kojeg je 15.11.2022. godine zamijenila Jasminka Biogradlija.

Osnovna djelatnost JP „ViK“ d.o.o. Zenica jeste proizvodnja i distribucija pitke vode (prikupljanje, prečišćavanje i distribucija) i odvodnja otpadnih voda. Društvo također vrši proizvodnju i distribuciju električne energije korištenjem vode za piće iz javnog vodovodnog sistema (mini hidroelektrana nominalne snage 485 kW).

Uslovi poslovanja u 2022. godini su bili slični kao u prethodnim godinama po pitanju socijalno ekonomskih prilika i drugih događaja kao što su dugotrajni sušni periodi, početak rata u Ukrajini (koji je imao ogroman uticaj na poslovanje svih firmi u svijetu), poskupljenje električne energije za privredne subjekte u iznosu 20%, i sl. Ipak, JP „ViK“ d.o.o. Zenica je uspjelo obezbijediti kontinuirano snabdijevanje vodom za piće koja odgovara propisanim standardima iz ove oblasti. Iako je cijena vode i naknade za kanalizaciju povećana od 01.11.2021. godine, građani Zenice i dalje plaćaju najnižu cijenu vode od svih gradova u BiH. Vodosnabdijevanje Grada Zenica se vrši s tri izvorišta (Kruščica, Strmešnjak i Klopče), te jednog otvorenog vodozahvata (Babina rijeka).

Redovna kontrola vode za piće vrši se u laboratoriju Preduzeća, dok dodatnu kontrolu u skladu sa važećim zakonskim propisima vrši akreditovana eksterna laboratorija. Preduzeće vrši redovnu mikrobiološku i hemijsku analizu nehlorisane i hlorisane vode, te je broj izvršenih kontrola znatno iznad minimuma koji je propisan Pravilnikom o ispravnosti vode za piće (kontrolisano ukupno 5.240 uzoraka vode, te su svi uzorci hlorisane vode bili 100% ispravni).

U 2022. godini je ukupno isporučeno i fakturisano 3,13% manje vode nego u 2021. godini i 9,45% manje od plana. Količina isporučene i fakturirane vode je direktno proporcionalna potrebama potrošača, te je evidentan usporen oporavak privrede, te smanjen broj potrošača zbog trenda iseljavanja stanovništva. Ukupan broj priključaka je povećan za 374 priključka.

Što se tiče količine neprihodovane vode (gubitka), može se konstatovati dalja tendencija pada u 2022. godini, a ostvareni rezultat predstavlja i dalje jedan od najboljih

rezultata u BiH (gubici vode u mreži za 2022. godinu iznose 26,85% od ukupno proizvedene vode), a zbog preuzetih aktivnosti na poboljšanju efikasnosti upravljanja gubicima (vodovodna mreža kojom upravlja Preduzeće ima dužinu cca 200 km).

Preduzeće održava i rasprostranjenu i izuzetno kompleksnu kanalizacionu mrežu Grada i prigradskih naselja u dužini cca 120km. U 2022. godini izvršeno je 1.257 intervencija na fekalnoj kanalizaciji.

Na dan 31.12.2022. godine u Društvu je bilo zaposleno ukupno 174 radnika. Prosječna neto plata u 2022. godini je iznosila 1.250,75 KM.

**Ukupna potraživanja na dan 31.12.2022. godine iznose 10.742.806,93 KM (8.915.683,66 KM sumnjiva i sporna potraživanja, te 1.827.123,27 KM redovna potraživanja), od čega:**

- Privreda (vodovod i kanalizacija)	801.656,44 KM
- Domaćinstva (vodovod i kanalizacija)	875.176,62 KM
- Privreda i domaćinstvo (ostale usluge)	150.290,21 KM

Ukupan stepen naplate potraživanja za period 01.01.2022. – 31.12.2022. godine iznosi 99,64%, a stepen naplate redovnih potraživanja iznosi 92,88%.

**Ukupne dugoročne i kratkoročne obaveze Preduzeća na dan 31.12.2022. godine iznose 6.667.343,76 KM, i to:**

- Dugoročne obaveze	3.085.728,44 KM
- Kratkoročne obaveze	3.581.615,32 KM

Sve obaveze prema dobavljačima u zemlji i inostranstvu koje su dospjele su plaćene, kao i sve druge dospjele obaveze, te se može reći da je ovo preduzeće solventno i likvidno.

**Stanje novčanih sredstava na žiro računima i blagajni na dan 31.12.2022. godine iznosi 544.136,39 KM, dok su u komercijalnim bankama oročena novčana sredstva u iznosu 5000.000,00 KM.**

Društvo je u 2022. ostvarilo prihode u iznosu od 8.984.468,30 KM, što je za 17,76% više u odnosu na isti period prošle godine, te za 4,38% manje u odnosu na plan. Iako su fakturisane količine vode manje od količina fakturisanih u prošloj godini i manje u odnosu na plan, na povećanje prihoda uticala promjena tarifa, tj. povećanje cijena usluga. Pored obavljanja osnovne djelatnosti, posebno treba navesti prihode od prodaje električne energije u iznosu od 384.733,08 KM (pri čemu su ukupni troškovi održavanja iznosili cca 4.600 KM).

**Ukupni rashodi su iznosili 8.169.140,08 KM i veći su u odnosu na 2021. godinu za 11,46%, te za 0,10% manji u odnosu na plan. Najveća stavka rashoda jesu plaće radnika (bruto 4.079.854,83 KM, što čini 49,94% ukupnih rashoda poslovanja).**

**Ostvarena bruto dobit Preduzeća izvještajnog perioda je 815.328,22 KM. Ostvarena neto dobit izvještajnog perioda je 759.897,94 KM.**

U toku 2022. godine Preduzeće je izvršilo investiciona ulaganja u iznosu 2.344.443,06 KM, od čega 688.629,72 KM iz vlastitih sredstava.

U 2022. godini Nadzorni odbor je održao 9 redovnih sjednica, dok vanredne sjednice nisu održavane. Ocijenili su da je direktor vodio preduzeće profesionalno i uspješno, sa napomenom da je nastavio ostvarivati planom postavljene zadatke. Odbor za reviziju je u istom periodu održao 12 redovnih sjednica.

Reviziju finansijskih izvještaja je obavilo Društvo za reviziju „Etic“ d.o.o. Zenica, te su dali pozitivno mišljenje na iste. Naglasili su da izvještaji daju istinit i fer prikaz finansijskog položaja Društva, finansijsku uspješnost, i novčane tokove za 2022. godinu, te su u skladu sa

međunarodnim standardima finansijskog izvještavanja i računovodstvenim propisima koji se primjenjuju u FBiH.

Nadzorni odbor i Odbor za reviziju su svojim odlukama usvojili Izvještaj o poslovanju, te Izvještaj o reviziji finansijskih izvještaja JP ViK d.o.o. Zenica, za 2022. godinu.

Služba za vodoprivredu, putnu infrastrukturu i mjesne zajednice je dala pozitivno mišljenje na priloženi Izvještaj o poslovanju, na poslovni odnos Službe sa Preduzećem i Upravom, te istakla kvalitetno, i u skladu sa pravilima struke ispunjavanje ugovornih obaveza prema Gradu Zenica.

Sektor za javna preduzeća i javne ustanove dostavlja Izvještaj o poslovanju JP "Vodovod i kanalizacija" d.o.o. Zenica za 2022. godinu, sa pratećim izvještajima, Gradskom vijeću na dalje razmatranje i odlučivanje.

**PRILOZI:**

1. Izvještaj o poslovanju JP "ViK" d.o.o. Zenica za 2022. godinu, sa Prijedlogom Odluke Nadzornog odbora o usvajanju i Zaključkom Odbora za reviziju o razmatranju istih,
2. Izvještaj Nezavisnog revizora za godinu koja je završila 31.12.2022. godine sa Zaključkom Nadzornog odbora o prihvatanju istog,
3. Izvještaj o radu Nadzornog odbora JP "ViK" d.o.o. Zenica za 2022. godinu, sa ocjenom stanja u preduzeću i ocjenom direktora preduzeća i Zaključak NO o utvrđivanju istog,
4. Izvještaj o radu Odbora za reviziju JP "ViK" d.o.o. Zenica za 2022. godinu.

S poštovanjem,

Šefica sektora za  
javna preduzeća i javne ustanove  
Mia Pojskić



DOSTAVLJENO:  
1x Naslov  
1x a/a

